

NAQQIISSUT

Siunnersuummik 8. februar 2014-imeersumik taarsiisoq.
Taamaallaat siunnersuummut nassuiaatini allannguuteqartoqarpoq.

Uunga siunnersuut: Suliffeqarnermi innersuussisarneq il.il. pillugit Inatsisartut inatsisaat nr. Xx, xx 2014-imeersoq

Kapitali 1

Nassuiaatit atuuffiilu

§ 1. Suliffeqarnermi innersuussisarneq paasineqassaaq suliffeqarnermi ineriartorneq siuarsarniarlugu nuna tamakkerlugu, illuinnaasiunngitsumik akeqanngitsumillu sullissinertut, taamatuttaaq sulisartut suliamut tunngatillugu nukittorsarneqarnissaat nunamilu nuttarsinnaanerat ilanngullugit.

Imm. 2. Suliffissamik innersuussisarneq paasineqassaaq suliffissarsiortup sulisitsisullu akornanni suliffeqarnermi pissutsit aalajangersimasut pilersinneqarnissaat siunertarlugu ataveqatigiissitsinertut.

Imm. 3. Suliffeqarnermi innersuussisarfiup suliassaraa inuussutissarsiutinit atorfinnillu assigiinngitsunit tamanit suliffissarsiortunut suliffissanik innersuussisarneq aamma sulisitsisinut sulisussanik innersuussisarneq. Taamatuttaaq suliffeqarnermi innersuussisarfiup ilinniagaqarnermut tunngasuni qinnuteqartunik siunnersuineq allaffissornikkullu aqutsineq suliassarai.

Imm. 4. Inatsit sulinermut Kalaallit Nunaanni sularineqartumut atuuppoq, tassunga ilanngullugit suliffissarsiortut Kalaallit Nunaanni suliffissarsiortut killilersimaarneqarnissaat pillugu Inatsisartut inatsisaat naapertorlugu nunatsinni sulisartutut isigineqartut.

Kommunalbestyrelsip suliassai

§ 2. Kommunalbestyrelsip suleqataalluni suliffeqarnermut tunngasutigut ingerlatsinerminnut ilanngullugu

- 1) Kommunimi suliffeqarnermi ineriartorneq malinnaavigissavaa,
- 2) Kommunimi iliuusissanik inuussutissarsiortunerup ineriartortinneqarneranut suliffissaqartitsinermullu pingaarutilinnik aallartitsisarnissamut tunngavissat pilersissavai suliniutigisassallugillu, kiisalu
- 3) Kommunimi suliffeqarneq pillugu paasissutissat katersussavai nalilersorlugillu, paasissutissallu tamakku Naalackersuisunut nalunaarutigisassallugit.

Imm. 2. Imm. 1, nr. 3 naapertorlugu Naalakkersuisut nalunaarutiginnittarneq pillugu erseqqinnerusunik malittarisassanik aalajangersaasinnaapput.

§ 3. Kommunalbestyrelsi pisussaavoq kommunimi suliffeqarnermi innersuussisarfissaqartitsissalluni, taamatuttaaq suliffissanik innersuussisarnermik aamma ilinniartitaanernut inuussutissarsiutinullu ilitsersuisarnermik aqqissuussissalluni, §§ 5 - 9 takukkit.

Imm. 2. Kommunalbestyrelsip kommunimi suliffissaqartitsineq pillugu kisitsisitigut paasisutissat Naalakkersuisunut nalunaarutigisassavai.

Imm. 3. Naalakkersuisut kommunalbestyrelsip kisitsisitigut paasisutissanik il.il. nalunaaruteqartarnera pillugu malittarisassanik aalajangersaasinnaapput.

§ 4. Kommunalbestyrelsip sulissutigissavaa kommunimi suliffeqarnermi illuatungeriit pisortallu ingerlatsiviisa akornanni tatigeqatigiiffiusumik qanittumillu suleqatigiinnermik pilersitsisoqarnissaa, taamaalilluni sulisartut ineriartortinneqarnerannut suliniuteqarnissamut tunngavissaqalissammat, siunissami qaninnermi ungasinnerusumilu inuussutissarsiortut pisariaqartitaannut kommunimilu inuussutissarsiutit ineriartortinneqarnerannut periarfissanut tulluussakkanik.

Imm. 2. Kommunalbestyrelsi kommunimi sulisartut piginnaasaasa nukittorsarneqarnissaannut suliffissaqartitsinermut tunngatillugu iliuusissanik aallartitsinissamut siunnersuusiussaaq.

Imm. 3. Kommunalbestyrelsi suliffissaqartitsinermut tunngatillugu aamma/ imaluunniit ilinniartitaanermut tunngatillugu immikkut neqeroorutinik inuusuttunut 30-t ataallugit ukiulinnut sammisitanik aallartitsissaaq.

Inuussutissarsiutinut ilinniartitaanernullu ilitsersuisarneq kiisalu suliffissanik innersuussisarneq

§ 5. Kommunalbestyrelsi suliffissarsiortunut inunnullu piginnaanngorsaanerup ingerlaneranut imaluunniit Piareersarfinni suliniutinut peqataasunut ataasiakkaanut iliuusissanut pilersaarusiussaaq.

Imm. 2. Inuussutissarsiutinut ilinniartitaanernullu ilitsersuinermut ilaapput inuussutissarsiummik ilinniartitaanermillu toqqaaniarnermi ikiorsiinerit.

Imm. 3. Kommunalbestyrelsi Inatsisartut inatsisaat manna malillugu kommunalbestyrelsip suliassaasa allaffissornikkut aqunneqarnerannut Piareersarfinnik pilersitsisinnaavoq.

Imm. 4. Kommunalbestyrelsi inuussutissarsiutinut ilinniartitaanernullu ilitsersuinerup kiisalu suliffissanut innersuussisarnerup inernera pillugu Naalakkersuisunut nalunaaruteqarnissamut pisissaaffeqarpoq.

Imm. 5. Naalakkersuisut pissutsit imm. 2-4-mi taaneqartut piviusunngortinneqarnissaannut malittarisassanik aalajangersaasinnaapput, taamatuttaaq Piareersarfiit pilersinneqarnerannut ingerlanneqarnerannullu tapiissuteqartarneq pillugu malittarisassaliorsinnaallutik.

§ 6. Suliffissamik innersuussisoqartinnagu akissarsiat aamma sulinermi atorfinitsitaanermilu atugassarititaasut allat pillugit paasissutissat pissarsiarineqassapput.

§ 7. Suliffissanik ataavartuusunik innersuussineq, suliffissarsiortup najukkaminit nuuttari-aqarneranik nassataqartitsisoq pisinnaavoq

- 1) nuunneq suliffeqarnermi najukkami suliamullu tunngatillugu pisariaqartitanik naliliineq aallaavigalugu kissaatigineqartutut isigineqarpat,
- 2) suliffissarsiortoq akuersippat,
- 3) innersuunneqartoq angallanneqarnermut pisattanillu nuussinermut aningaasartuutissin-neqassanngippat,
- 4) najugarisami naammattunik piginnaanilinnik sulisussaqaanngippat, aamma
- 5) innersuunneqartoq inissaqartinneqassappat.

Imm. 2. Sulisartup najugaqarfiguagaanit qimagulluni ukiup ilaatigut sulinermit imaluunniit piffissami killeqartumi sulinermit innersuussineq pisinnaavoq:

- 1) nuunneq suliffeqarnermi najukkami suliamullu tunngatillugu pisariaqartitanik naliliineq aallaavigalugu kissaatigineqartutut isigineqarpat,
- 2) suliffissarsiortoq akuersippat,
- 3) innersuunneqartoq angallanneqarnermut pisattanillu nuussinermut aningaasartuutissin-neqassanngippat, aamma
- 4) najugarisami naammattunik piginnaanilinnik sulisussaqaanngippat.

Imm. 3. Naalackersuisut aningaasartuutit imm. 1, nr. 3-mi aamma imm. 2, nr. -mi taaneqartut matussutissaannut tapiissuteqarsinnaapput. Naalackersuisut tamakku pillugit malittarisassanik erseqqinnerusunik aalajangersaasinnaapput.

§ 8. Sulisussanik sulisitsisumut imaluunniit suliffeqarfimmut innersuussisoqarsinnaanngilaq sulisartut kattuffiannit soqutigisaqaqatigiiffimmilluunnit allamit uppersartaatit sukumiisut malillugit sulisartut suliumajunnaarneranni imaluunniit sulisitsisut mattussineranni eqqu-gaasumut, tamanna isumaqatigiissutinut akerliusutut nalilernerqarsimannngippat.

§ 9. Atorfimmut inuttaqaanngitsumut sulisussamik naleqquttumik innersuussisoqarsinnaagaa-ngat tamanna pillugu kommunalbestyrelsi sulisitsisumut nalunaaruteqartassaaq.

Imm. 2. Sulilernissaagaluq piviusunngunngitsoorpat sulilernerluunniit aallartikkaluaannaq taamaatinneqarpat sulisitsisoq pisussaavoq tamanna pillugu kommunalbestyrelsimut piaartumik nalunaaruteqassalluni taamatullu tamatumunnga pissutaasoq nalunaarutigissallugu.

Imm. 3. Sulisitsisoq sulisussanik innersuunneqartunik itigartitsisoq angallanneqarnermut pisattallu nuunnerinut aningaasartuutigineqarsimasunik utertitsilluni akiliisussaataavoq, sulisussanik allanik sulilersitsineq itigartitsinermit pissutaasimappat sulisitsisorlu kommunalbestyrelsimut piffissaagallartillugu suliffigiligassamut angalanerup pinngitsoortinneqarsinnaasimagaluarneranik ilisimatitsissuteqarsimannngippat.

Aalajangersakkat assigiinngitsut

§ 10. Naalakkersuisut nuna tamakkerlugu suliffissanik nalunaarsuivimmik pilersitsisinnaapput, suliffissanik neqeroorutit, suliffissaaleqinermik allaffissornikkut aqutsinerup aammalu kisitsisitigut paasissutissiornissat nalilersuillunilu misissueqqissaarnissat siunertaralugit tunngaviusumik paasissutissat katersorneqarfigisinnaasaannik suliareqqinneqarfigisinnaasaannillu.

Imm. 2. Naalakkersuisut imm. 1 malillugu suliffissanik nalunaarsuiffiup pilersinneqarnissaa pillugu malittarisassanik aalajangersaasinnaapput, taamatuttaaq suliffissanik nalunaarsuiffiup atornissaanut kommunalbestyrelsip pisussaaffii pillugit malittarisassaliorsinnaallutik.

§ 11. Naalakkersuisut kommunini sulisunik suliffeqarnermi innersuussisarnermik il.il. suliartunik ukiumoortumik pikkorissartitsisassapput.

Imm. 2. Naalakkersuisut kommunalbestyrelsinut qinersisoqareernerani tamatigut kommunalbestyrelsimut ilaasortanut peqqussummi matumani pineqartunik suliassaqartitaasunut pikkorissartitsisassapput.

Imm. 3. Imm. 1 aamma 2 naapertorlugit pikkorissartitsinernut aningaasartuutit Nunatta Karsianit kommuninillu akilerneqartassapput.

§ 12. Naalakkersuisut suliassaqartitsinermik siuarsaaniarluni iliuitsinut aamma Piareersarfinni suliniutinut tapiissuteqarsinnaapput, takukkit § 4-imi imm. 2 aamma 3. Tapiissutit anner-tussusissaat ukiumoortumik aningaasanut inatsisini aalajangersarneqartassapput.

Imm. 2. Naalakkersuisut tapiissutit agguanneqartarnerinut akiliutigineqartarnerinullu maluagassanik aalajangersaasinnaapput.

§ 13. Naalakkersuisut suliffissaaleqinerup akiorneqarnissaa kiisalu suliffeqarnermi innersuussisarnerup pisariillisaavigineqarnissaa ineriartortinneqarnissaalu siunertaralugit misileraanerit pillugit malittarisassanik aalajangersaasinnaapput.

§ 14. Naalakkersuisut ukiumi qaangiuttumi suliffeqarnermi suliniutaasut aamma piffissami aggersumi anguniagaasut taamatuttaaq malitseqartitsinissat aallartinneqassanersut pillugit ukiumoortumik nalunaarusiortassapput.

Naammagittaalliuuteqartarnej

§ 15. Inatsit manna malillugu kommunalbestyrelsip aalajangiinerinik naammagittaalliuutit sapaatit akunneri sisamat qaangiutsinnagit Naalakkersuisunut suliassanngortinneqarsinnaapput.

Atuutilerfia

§ 16. Inatsisartut inatsisaat ulloq 1. juli 2014-imi atuutilissaaq.

Imm. 2. Tamatumunnga peqatigitillugu Suliffeqarnermi innersuussisarneq il.il. pillugu Inatsisartut peqqussutaat nr. 10, 18. december 2003-meersoq atorunnaarsinneqassaaq.

Imm. 3. Malittarisassiat Inatsisartut inatsisaanni taaneqartumi imm. 2-p malitsigisaanik aalajangersarneqartut ingerlaannassapput, inatsisartut inatsisaannit matuma imaluunniit allat malitsigisaannik allanngortinneqarnissanik atuukkunnaarsinneqarnissamilluunniit tungaannut.

Namminersorlutik Oqartussat, ulloq xx.xx.2014

Aleqa Hammond